



Inatsisartuni ilaasortamut
Juno Berthelsen
Naleraq

15-06-2026
Suliap normua.:
2024 - 10523
Allakkap ilisarnaataa:
26574850

Postboks 260
3900 Nuuk
Oq. (+299) 34 50 00
Nassitsigasuaat (+299) 34 66 66
Mail: miin@nanoq.gl
www.naalakkersuisut.gl

Ulluunerani paaqqinnittarfinnut aamma ernereernerup kingorna sulinngiffeqarnermut atatillugu aningaasartuutit pillugit §37 naapertorlugu apeqquummut nr. 099-imut akissut

Uunga, Inatsisartunut ilaasortaq, Juno Berthelsen.

Apeqqutinnut qujanaq. Apeqqutit tullinnguuttut ataasiakkaarlugit saqqummersinneqarput, akissutiniq tulleqartiterlutik.

1. Meeqqamut ataatsimut ukiumut paaqqinnittarfimmiineranut pisortanit aningaasartuutit qanoq annertutiginnersut Naalakkersuisut paasissutissiissutigisinnaavaat?

Meeqquerivinnut aningaasartuutit kommunit akisussaaffiiniippoq. Kommunit tamarmik, meeqqerivinni meeqqamut ataatsimut aningaasartuutit qaffasissusaat, namminneerlutik aalajangersartarpaat. Tamanna meeraaqqerivinnut meeqqerivinnullu atuuppoq. Aningaasartuutit taamaammat Naalakkersuisut paasissutissiissutigisinnaanngilaat.

a) **Meeraq ataaseq meeraaqqerivimmiittoq ukiumut pisortanit qanoq aningaasartuutigineqartarpat? Naalakkersuisut qinnuigineqarput aningaasartuutit meeqqat ukiuinut 0-, 1-2, 2-3 nalunaarsoqqullugit.**

a. Apeqquummut 1-imut akissut innersuussutigineqarpoq.

b) **Meeraq ataaseq meeqqerivimmittoq ukiumut pisortanit qanoq aningaasartuutigineqartarpat? Naalakkersuisut qinnuigineqarput aningaasartuutit meeqqat ukiuinut 3-4, 4-5, 5-6 nalunaarsoqqullugit.**

Naalakkersuisut qinnuigineqarput eqimattanut marlunnut, ukioqatigiiaat immikkoortillugit, aningaasartuutit naatsorsussagaat, taamaalilluni ukiumut aningaasartuutaasartut assigiinngissusaat ersarinnerusumik takuneqarsinnaalissammat.

a. Apeqquummut 1-imut akissut innersuussutigineqarpoq.



2. Sapaatit-akunnerini 52-ini meeraq angerlarsimaffimmi paarineqassappat, erninermut atatillugu aningaasartuutit meeqqamut ataatsimut qanoq amerlatigissanersut Naalakkersuisut ilisimatitsissutigisinnaavaat?

Erninermut atatillugu sulinngiffeqartarnermut tunngasut Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoqarfiup isumagisarai. Taamaammata akissut ataani allassimasooq naalakkersuisoqarfimmit pineqartumit aaneqarnikuvoq.

“Akissummi angerlarsimaffimmi paarsisarnermut aqqissuussaq innersuutigineqarsorineqarpoq, tassa angajoqqaat namminneq meeqqatik ulluunerani meeqqerivimmiitinnagit paarisarlugit. Ullumikkut Nunatsinni angerlarsimaffimmi paarsisinnaanissamat pisortat aqqissuussaqanngillat, taamaattumik akissummi taamaallaat eqqarsaataannarsorneq (teoretisk) inatsisinullu atuuttunut atatillugu atuutinnigitsut tunngavigneqarput.

Taamaakkaluatoq Naalakkersuisut erninermi sulinngiffeqarnermut inatsit atuuttoq naapertorlugu, meeraq angerlarsimaffimmi sap. ak. 52-it paarineqassagaluarpas, erninermi ullormusiat qanoq akeqassaneranut naatsorsukkamik takussutissiorsinnaapput.

Erninermi ullormusiat nal. akunneranut aalajangersagaapput, 2026-mi nal. akunneranut 106,47 kr.-ullutik, takuuk Aningaasat isumaginninnermi tunniunneqartartut pillugit kaajallaasitaq.

Erninermi ullormusiat, sulinngiffeqarfissaq sioqqullugu, sapaatit akunnerini 13-ini kingullerni nalunaaquttap akunnerinik agguaqatigiissitsinikkut, pineqartup suliffigisimasai aallaavigalugit naatsorsorneqassapput, takuuk Naartunermi, erninermi meeravissiaartaarnemilu sulinngiffeqartarneq pillugu Inatsisartut inatsisaat nr. 5, 19. novembari 2020-meersoq. Sapaatip akunneranut nal. akunneri 40-nit amerlanerusinnaanngillat. Innuttaasup sapaatip akunneranut nal. akunneri suliffigisai 14-init ikinneruppata, nal. akunneranut kisitsisit piffissamat tamarmiusumut nal. akunneri 14-iutinneqassapput, takuuk. § 41, imm. 3.

Taamaattumik innuttaasup sulisimassusaa apeqqutaalluni, sapaatip akunneranut nal. 14-it 40-llu akornanni ernereernerup kingorna ullormusiaqartoqarsinnaavoq.

Tamanna sapaatit akunnerini 52-ini angerlarsimaffimmi paarsinermut naatsorsukkanik ima takussutissiivoq:

	Akunermut akigititaq	Nal. ak. / sap. ak.	Sapaatip akunneri	Aningaasartuutit katillugit	
Minnerpaamik	106,47 kr.	14	52	77.510 missaat	kr.-it
Annerpaamik	106,47 kr.	40	52	221.458 missaat	kr.-it

Taamaattumik angerlarsimaffimmi paarsinermut aqqissuussinermut aningaasartuutit innuttaasumut ataatsimut meerartaarsimasumut 77.510 kr.-it aamma 221.458 kr.-it akornanniissapput.

Naalakkersuisut naatsorsukkani makku pingaarutillit ilanngunneqartariaqarsoraat:

Siullermik erninermi ullormusiat taarsiivigininnissamik tunngaveqarput. Suliffimmiinnginnermi aningaasarsiasaraluit taarserlugit ullormusiaqartitsisoqartarpoq, angerlarsimaffimmilu meeqqamik paarsinermut akiliutaanatik.



Taamaattumik erninermi ullormusiat angerlarsimaffimmilu paarsinermut aaqqissuussinermut aningaasartuutit toqqaannartumik sanillersuunneqarsinnaanngillat, taakku aaqqissuussat marluk siunertaat sullinniagaallu assigiinnginnerat pissutaasut ilagimmassuk. Erninermi ullormusiat angajoqqaanut suliffeqarfeqarfirmut attuumassuteqareersunut tunngatitaapput, ullormusiassallu angerlarsimaffimmi paarsinermut aaqqissuussatut pisortanit ikiorsiissutissanngorlugit nuunneqarsinnaanatik, takuuk Naartunermi, erninermi meeravissiartaarnermilu sulinngiffeqartarneq pillugu Inatsisartut inatsisaat nr. 5, 19. novembari 2020-meersoq.

Aappaattut aningaasartuut ulluinnarni nikerarujussuassaaq, angajoqqaat ataasiakkaat sulinngiffeqarneq sioqqullugu, sapaatit akunneri kingulliit 13-it nal. akunneri suliffigisaasa agguaqatigiinnerat apeqqutaassammata. Angajoqqaat nal. akunneri amerlanerpaaffianiittunik pisinnaasut tamarmiunaviannngillat.

Pingajuattut oqaatigineqassaaq, maleruagassat atuuttut naapertorlugit angerlarsimaffimmi meeqqanik arlalinnik paarsaqarneq, erninermi ullormusianik amerlanerulersitsinaviannngitsoq. Meeqqamut ataatsimut aningaasartuut aallaaviatigut taannaaginnassaaq, meeqqat paarsat amerlassusaat apeqqutaatinnagu, pissutigalugu ullormusiat angajoqqaat suliffeqarnerannut tunngammata meeqqallu amerlassusaannut tunngassuteqaratik.

Naggataatigut oqaatigineqassaaq, angerlarsimaffimmi paarsinissamut aaqqissuussisoqassappat immikkut inatsisiliorfigineqartariaqassasoq, erninermi sulinngiffeqartar inatsimmut atuuttumut ilassutitut ilanngutiinnarneqarsinnaanani.”

Erseqqissaatigeqqissavara apeqqutip aappaannut akissutit Naalakkersuisumit susassaqartumit akissutaamata.

Inussiarnersumik inuulluaqqusillunga


Mariane Paviassen Jensen